

07/10/1997

Krisis mata wang: Pulau Pinang terus sokong PM

GEORGETOWN, Isnin - Kerajaan Negeri Pulau Pinang akan terus memberi sokongan padu kepada Perdana Menteri, Datuk Seri Dr Mahathir Mohamad dan kerajaan pimpinannya dalam menghadapi krisis mata wang dan bursa saham.

Ketua Menteri, Tan Sri Dr Koh Tsu Koon, berkata dakwaan media asing kononnya kenyataan dan kritikan Perdana Menteri terhadap penyangak mata wang memberikan kesan kepada kejatuhan nilai ringgit adalah tidak berasas.

Beliau berkata, jika kritikan Dr Mahathir menjadi punca kejatuhan nilai ringgit ketika ini, kenapa nilai mata wang negara Asean lain turut menghadapi masalah yang sama.

"Sehubungan itu, kerajaan negeri akan memberi sokongan penuh kepada Perdana Menteri dan Timbalan Perdana Menteri, Datuk Seri Anwar Ibrahim dan Kerajaan Pusat dalam usaha mereka untuk memulihkan keadaan ekonomi," katanya pada sidang akhbar di pejabatnya di Perbadanan Pembangunan Pulau Pinang (PDC), di sini hari ini.

Sidang akhbar itu berhubung agihan pelaburan RM1 bilion oleh pengeluar komponen terkemuka dunia Hewlett-Packard (HP) dalam pembangunan manusianya bagi pelaburan tunggal terbesar HP Malaysia di Pulau Pinang.

Dr Koh menyifatkan keadaan Malaysia ketika ini sebagai sebuah kapal yang sedang melalui gelombang besar dalam proses pembangunan ekonominya.

"Sehubungan itu, tidak ada sebab untuk menukar nakhoda serta pasukannya ketika ini," katanya.

Beliau berkata, Thailand dan Indonesia juga menghadapi kejatuhan nilai mata wang lebih teruk daripada Malaysia walaupun pemimpinnya tidak pernah mengeluarkan kenyataan atau mengkritik sistem pasaran mata wang dunia.

"Kalau benar ia menjadi punca nilai mata wang Thailand dan Indonesia turut menjunam walaupun mereka tidak mengkritik atau membuat ulasan mengenai perkara itu.

"Serangan media asing terhadap Perdana Menteri adalah tidak adil dan kita harus melihat kepada trek rekod beliau sejak 16 tahun lalu menjadikan Malaysia sebuah negara berwawasan dan lebih penting membuka lebih banyak peluang ekonomi kepada rakyat Malaysia," katanya.

(END)